



BAŠTINA *sjeveroistočne Bosne*

BROJ 8



Mr. Semir HADŽIMUSIĆ

**NAUČNA KONFERENCIJA
„KULTURNO-HISTORIJSKO I PRIRODNO NASLIJEĐE OPĆINE LUKAVAC“
Lukavac, 31. oktobar 2015.**

U organizaciji Zavoda za zaštitu i korištenje kulturno-historijskog i prirodnog naslijeđa Tuzlanskog kantona i Javne biblioteke Lukavac, u Lukavcu je u subotu 31. oktobra 2015. godine održana naučna konferencija pod nazivom: „Kulturno-historijsko i prirodno naslijeđe općine Lukavac“. Pokrovitelj naučne konferencije bila je Općina Lukavac, a partneri Sisecam Soda Lukavac.

Dugo i sveobuhvatno pripremana konferencija održana je u objektu Vila „Solvay“, najvrednijoj historijskoj građevini u gradu Lukavcu. Vila „Solvay“, u kojoj se održavao ovaj vrijedan naučni skup, predložena je od strane Zavoda za zaštitu i korištenje kulturno-historijskog i prirodnog naslijeđa Tuzlanskog kantona za nacionalni spomenik Bosne i Hercegovine.

Za pripremu naučne konferencije formirani su Organizacioni i Naučni odbor. Predsjednik Organizacionog odbora bio je Dževad Mujkić, načelnik Općine Lukavac, dok je predsjednik Naučnog odbora bio Mirsad Kunić, vanredni profesor Filozofskog fakulteta u Tuzli.

Svečano otvaranje konferencije započelo je izvedbom prigodne muzičke tačke od strane mladih i talentovanih muzičara, polaznika muzičke škole, sestre i brata Aide i Tarika Rešidbegovića, nakon čega su uslijedila obraćanja. Ispred organizatora obratile su se Nihada Fajić, direktorica Javne biblioteke Lukavac i Arijana Grgić, predsjednica Upravnog odbora Zavoda za zaštitu i korištenje kulturno-historijskog i prirodnog naslijeđa TK. Nakon toga prisutne je pozdravio Izet Jagodić, ministar obrazovanja, nauke, kulture i sporta u Vladi Tuzlanskog kantona, potom i Dževad Mujkić, načelnik Općine Lukavac, koji je konferenciju i proglasio otvorenom.

Na konferenciji je predstavljeno 39 radova sa rezultatima dosadašnjih i novih istraživanja iz oblasti kulturno-historijskog i prirodnog naslijeđa općine Lukavac



(historijsko, arheološko, etnološko, kulturno, religijsko, spomeničko, urbanističko-graditeljsko, prirodno, jezičko, usmeno i pisano književno naslijeđe). Konferencija se odvijala cijeli dan i to kroz šest sesija.

Uvodno predavanje na temu „Značaj naslijeđa Lukavca i okoline – primjer nišana Ibrahim-age u Smolući“ održao je akademik prof. dr. Omer Ibrahimagić, profesor na Fakultetu političkih nauka u Sarajevu. *„Ukupno i pojedinačno naslijeđe grada Lukavca i cijele općine Lukavac je veoma bogato i raznovrsno. Naslijeđe ima veliki značaj u životu svake društvene zajednice i svakog pojedinca. Shodno tome, cijela zajednica treba da bude više angažovana u pogledu očuvanja, obnove, afirmacije i promocije kulturno-historijskog i prirodnog naslijeđa Lukavca, ali i Bosne i Hercegovine“*, naveo je, između ostalog, u svom obraćanju akademik Ibrahimagić. Drugi se obratio prof. dr. emeritus Salih Kulenović, koji je u koautorskom radu sa Mihadom Sakićem i Nihadom Kulenovićem predstavio rezultate dosadašnjih arheoloških i etnoloških istraživanja područja općine Lukavac. *„Od 70-tih godina prošlog vijeka pa naovamo, na prostoru lukavačke općine djelomično su vršena arheološka rekognosciranja i jedno probno arheološko iskopavanje gradinskog naselja u Stuparima (jugoistočni dio planine Ozren). Etnološka istraživanja su vršena nešto detaljnije na prostoru današnjeg površinskog kopa Rudnika „Šikulje“ u periodu od 1984-1985. godine. O rezultatima istraživanja sa navedenog prostora koji obuhvata površinu cca 15 km² u ovom radu donosimo više podataka“*, istakao je Kulenović.

U nastavku radnog dijela konferencije predstavljene su osnovne crte još 37 radova iz oblasti kulturno-historijskog i prirodnog naslijeđa općine Lukavac. Predstavljeni su radovi sljedećih autora i koautora: dr. sc. Adi Ćorović, dipl. ing. arh. (Komisija za očuvanje nacionalnih spomenika Bosne i Hercegovine, Sarajevo), prof. dr. Mirsad Kunić, prof.dr. Izet Šabotić, prof. dr. Amira Turbić-Hadžagić, dr. sc. Salkan Užičanin, mr. sc. Senita Husić (Filozofski fakultet Univerziteta u Tuzli), prof. dr. Avdul Adrović, doc. dr. sc. Isat Skenderović, doc. dr. sc. Sanida Osmanović, doc. dr. sc. Semir Ahmetbegović, dr. sc. Edina Hajdarević, mr. sc. Alen Bajrić, mr. Senad Gutić, mr. sc. Sabina H. Halilović (Prirodno-matematički fakultet Univerziteta u Tuzli), mr. sc. Kasim Memić (Muzej istočne Bosne, Tuzla), prof. dr. Edin Mutapčić (Pravni fakultet Univerziteta u Tuzli), Zlatko Dukić, novinar i pisac (Ministarstvo obrazovanja, nauke, kulture i sporta TK), prof. dr. Nusret Mujagić, dipl. ing. arh (Fakultet za upravu Univerziteta u Sarajevu), prof. dr. Edhem Muftić (Lukavac), doc. dr. sc. Omer Hamzić (Pravni fakultet Kiseljak), mr. sc. Omer Zulić, Hatidža Fetahagić, prof. (Arhiv Tuzlanskog kantona), mr. sc. Nikola Čiča (Pedagoški zavod Tuzlanskog kantona), mr. sc. Ahmed Hatunić, Sevret Mehmedčehajić, prof., mr. sc. Šefko Sulejmanović (Behram-begova medresa u Tuzli), mr. sc. Munib Efendić (Gimnazija Lukavac), mr. sc. Nusret Kujraković (Medžlis IZ Gradačac), Tijana Veljković, dipl. ing. arh, Senad Begović, prof., Adnan Kalesić (vanjski saradnici Zavoda), Mihad Sakić, prof. (Javna biblioteka Lukavac), Radoslav Maksimović, dipl. ing. (Zrenjanin, Srbija), mr. sc. Almira Bećirović (OŠ Brčanska Malta, Tuzla), Aljoša Avdić, prof. (Prokosovići, Lukavac), Edin Šaković, prof.

(Redakcija Gračaničkog glasnika), Faruk Kruševljanin, novinar i publicista (Tuzla), mr. sc. Rusmir Djedović, Munisa Kovačević, prof., mr. Semir Hadžimusić, Almir Mutapčić, bachelor arheologije (JU Zavod, Tuzla).

Prije održavanja konferencije bio je objavljen i učesnicima podijeljen, u elektronskoj i printanoj verziji, zbornik sažetaka radova na bosanskom i engleskom jeziku, a na proljeće 2016. godine najavljeno je izdavanje i kompletnog zbornika radova naučne konferencije „Kulturno-historijsko i prirodno naslijeđe općine Lukavac“.

U zaključcima Naučnog odbora, prezentiranim poslije diskusije, na kraju konferencije, između ostalog, navodi se:

Prošlost Lukavca obrađena je iz različitih oblasti kroz prehistorijski, antički, srednjovjekovni, osmanski, austrougarski i period dviju Jugoslavija. Općina Lukavac, prema prezentiranim rezultatima istraživanja nudi: brojna potencijalna i potvrđena arheološka nalazišta od najstarijih vremena, bogato urbanističko-graditeljsko naslijeđe, bogato historijsko, industrijsko, kulturno, jezičko, književno, religijsko, spomeničko i prirodno naslijeđe. Predlaže se Zavodu za zaštitu i korištenje kulturno-historijskog i prirodnog naslijeđa da pokrene aktivnosti oko stavljanja novih objekata Lukavca na listu zaštićenih spomenika. Na bazi najnovijeg popisa životinjskih vrsta nužno je da se vrši permanentni monitoring i zaštita životinjskih vrsta na akumulaciji jezera Modrac. Podržavamo inicijativu općinskih vlasti za osnivanje zavičajnog muzeja. Učesnici su saglasni da ova konferencija treba da bude podsticaj za dalja istraživanja i nove skupove iz oblasti kulturno-historijskog i prirodnog naslijeđa Lukavca i šire.

Nekoliko dana po okončanju naučne konferencije javnosti je objavljena Odluka Komisije za očuvanje nacionalnih spomenika Bosne i Hercegovine da se objekat Vila „Solvay“, historijska građevina u kojoj je održana naučna konferencija, proglasi nacionalnim spomenikom Bosne i Hercegovine. Također, za nacionalni spomenik tada je proglašena i Katolička crkva sa župnom kućom u župi sv. Ante Padovanskog u Lukavcu (radi se isto o aplikaciji Zavoda za zaštitu i korištenje kulturno-historijskog i prirodnog naslijeđa TK).



Sl. 1. Učesnici naučne konferencije ispred Vile „Solvay“ u Lukavcu